



Aningaasanut Naalackersuisoq

Aningaasaqarnermut Ataatsimiititaliap suliaq nr. 01.31.06/09-00420 pillugu ataasinngornermi ulloq 20. juli 2009-mi aalajangiineranik Naalackersuisunut ilisimatitsineq

Julimiit 31. decembarip 2009 tungaanut sullissinissaq pillugu Royal Greenland A/S-imut isumaqatigiissut pillugu

Naalackersuisut **inassutigaa**,

- sullissinissamat isumaqatigiissut kr. 7.906.000-nik aningaasartalik ilanngunneqartoq taamatut isikkoqartillugu akuerineqassasoq.

Aningaasaqarnermut Ataatsimiititaliap oqaaseqaatai

Nunaqarfinni nunaqarfinnulluunniit aamma illoqarfinnut qanittuni tunisisinnaanikkut inuussutissarsiorsinnaanermut annermik periarfissaqarfiusuni suliffissaqartitsineq, ilinniartitsineq ilinniartitseqqiinerlu siuarsarniarlugit 20 mio. kr.-inik sillimmatissanik pilersitsinissaq pillugu Naalackersuisut qinnuteqaat Aningaasaqarnermut Ataatsimiititaliamit ulloq 28. juni 2009-mi akuersissutigineqarpoq. (Suliaq 09-417)

Tamanna tungavigalugu sullissinissaq pillugu Royal Greenland A/S-imik isumaqatigiissuteqarnissaq siunertaralugu sillimmatinit 7,9 mio. kr.-it atugassiissutigineqarnissaat Naalackersuisut qinnutigaat. Arsummi, Atammimmi, Ikerasaarsummi, Kangaamiuni, Kangaatsiami, Niaqornaarsummi Qeqertarsuatsiaanilu suliffissaqartitsinerup ingerlatiinnarneqarnissaa sullissinermik isumaqatigiissuteqarnermi siunertaavoq. Illoqarfinni taaneqartuni nunaqarfinni tunisassiorfinnik Royal Greenland matusisariaqarsimavoq, tassa tunisassiorfinni tunisassiorneq suliffeqarfimmut amigartoorutaammat.

Nunatta Karsianit tapiissutinik najugaqarfiit taaneqartut pinngitsuuisinnaannginnerannik annikillisisiniarnissaq Naalackersuisut pimoorullugu tunaartalimmik sulissutigisariaqaraat Aningaasaqarnermut Ataatsimiititaliaq tungaviusumik isigalugu isumaqarpoq. Najukkani innuttaasut nunattaluunniit aningaasaqarniarnera eqqarsaatigalugit tunisassiornerit imminut akilersinnaanngitsut Nunatta Karsiata aningaasaatai atorlugit ingerlatiinnarniarneqarnerat ungasinnerusoq isigalugu naapertuuttuunanilu attanneqarsinnaanngilaq.

Sullissinissamik isumaqatigiissut matumani pineqartoq 31. december 2009-mi atorunnaassaaq. Sullissinissaq pillugu 2010-mut atuuttussamik Royal Greenland aamma isumaqatigiissuteqarfigineqassanersoq 2010-mut aningaasanut inatsit akuersissutigineqartinnagu Naalackersuisunit paasineqareersimassasoq Aningaasaqarnermut Ataatsimiititaliamit tungavissaatinneqarpoq. Taamaassappat sullissinissamik isumaqatigiissut taamaattoq kingusinnerpaamik 2009-mi novemberip aallartinnerani

naammassereersimasariaqarpoq, taamaaliornikkut Inatsisartut 2010-mi aningaasanut inatsisissatut siunnersuummut tulleriarinerminni siunertamut aningaasanik immikkoortitsisinnaaqqullugit, taamaaliornikkullu sullissinissamik isumaqatigiissutaajunnartumik nutaamik suliarinninnissamut immaqalu akuersissutiginninnissamut Aningaasaqarnermut Ataatsimiititaliaq piffissaqarsinnaaqqullugu. 2010-mut atuuttussamik sullissinissamut nutaamik isumaqatigiissuteqarnissaq siunnersuutigineqassappat suliffissaqartitsinissap qulakkeerpeqarnissaa tamatumani kiserluinnarmi anguniagaasariaqarpoq. Toqqaannangikkaluamik tapiissutit paasiuminaatsut aqqutigalugit pisortat ingerlatseqatigiiffiini ingerlatseqatigiiffinniluunniit pisortanit tamakkiisuunngikkaluamik pigineqartuni aningaasaqarnerup napatinneqarnissaa Nunatta Karsiata suliaassinngilaa.

Nunaqarfinni aaqqissugaaneq pillugu anguniakkanik, sulisartut nunaqarfinni inuussutissarsiutinit imminut akilersinnaanngitsunit inuussutissarsiutitut allanut nuunneqarnerannik kinguneqartussatut naatsorsuutigineqartumik suliaqartoqassasoq Naalakkersuisut siusinnerusukkut oqaatigaat. Taamatut anguniagaqarnerup ilaatut sullissinissamik isumaqatigiissutip matumani pineqartup ingerlatiinnarnissaanut aningaasanik 2010 aallarnerfigalugu immikkoortitseqqinnissaq Naalakkersuisunit naatsorsuutigineqanngippat, tamanna nunaqarfinni siuliani taaneqartuni innuttaasunut sapinngisamik piaarnerpaamik ammasumik unneqqarissumillu nalunaarutigineqartariaqarpoq.

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliamit akuersissutigineqarput.

Aningaasaqarnermut Ataatsimiititaliaq sinnerlugu

Akitsinnguaq Olsen
Aningaasaqarnermut Ataatsimiititaliap siulittaasua